



Avammut tunioraaneq pillugu Naalackersuisunut susassaqtunullu sumulluunniit attuumassuteqanngitsumik nalilersueqqissaarluni inassuteqaasiortartussamik, Avammut Tunioraaneq pillugu Siunnersuisooqatigiinnik kingusinnerpaamik UPA2020-imi pilersitseqqullugit Naalackersuisut peqquneqarnissaannik siunnersuut. Ilanngullugu siunnersuutigineqarpoq, avammut tunioraernerup siuarsarneqarneranut suliniutit ingerlaavartumik nalilersorneqartarnissaat siunnersuisooqatigiit suliassaannut ilaatinneqassasoq.

(Inatsisartunut ilaasortaq Karl-Kristian Kruse, Siumut)

(Siullermeerneqarnera)

Siullermik Inatsisartunut ilaasortaq Karl Kristian Kruse qutsavigerusupparput Avammut Tunioraaneq pillugu Siunnersuisooqatigiinnik pilersitsinissap oqaaseqarfiginissaanut Demokraatit periarfissimmatigut.

Isumaqtigaaralu oqarmat ineriartorneq eqqarsaatigalugu nunatta piffissap pissanganartoq ornikkaa. Siunissaq eqqarsaatigalugu periarfissarpasuit pikialaarput, uangalu nammineq upperraara namminersortut periarfissaq akorluarumaaraat uangut politikereit suliassagut iluamik suliarisinnaagutsigit, tassalu eqqortunik sinaakkutissaliornissaq aamma eqqortumik inatsisiliornissaq.

Aamma isumaqarpunga ingeriarluta immitsinnut aperissasugut - soqarpugut aamma maani nunami suvugut? Matumani avammut tunioraaneq pillugu siunnersuisooqatigiinnik pilersitsinissaq siunnersuutigineqarpoq misissuilluaraanni paasinarluni pigineqareersoq. Naatsumik oqaatigalugu suliaq taanna ersunneqarpoq isumagineqarlunilu Visit Greenlandimit, Kalaallit Nunaanni takornariaqarneq pillugu Isumalioqatigiisitaasut. Taakku ilaatigut Naalackersuisunut siunnersuisarput nunarsuarmi sumi tunitsiviit pilerinarnersut aamma takornariaqarnermi suliniutit suut suliarineqassanersut taakku niuerfinnut ilisimasaat tunngavigalugit. Uanga nammineq tatigaakka sapinngitsut aamma suliarfik ingerlalluareeraat.

Visit Greenland sumut ingerlasoqarnera misissoqqissaartarpaat aamma niuerfinni qanoq ineriartortoqarnersoq aamma suliat tamakku ingerlanneqartarput nunani avannarlerni kattuffiit allat suleqatigalugit, tamannalu uanga nammineq iluarisimaarpara nunat suleqatigiit akornatsinni immitsinnut pisariillaattaratta suleqatigiillutalu, eqqartortuagarput naapertorlugu.

Naalackersuisoqarfik Naalackersuisullu ingerlaavartumik oqaloqatigiittarput. Aamma nalunngilarput Greenland Business avammut tunisassiorneq pillugu siunnersuisartoq inuutissarsiorneq naliginnaasumik eqqarsaatigalugu aamma tamatumani Danmarks Eksportråd suleqatigilluarneqartoq, taamaattumik saqqummiunneqartoq pioreerpoq. Pingaarnertut immikkut Avammut Tunisassiornermut Siunnersuisooqatigiit pigineqalernissaat kissaatigineqarpat taava pitsaassagaluarpoq periarfissat pioreersut misissortuugaanni qiviarlugulu taakku qanoq pitsaanerusumik atorsinnaanerigut.



Oqartariaqarpunga suliaq kusanartoq pitsaasorlu ingerlanneqareersut - aamma nunarsuarmioqatitsinnit ilisarimaneeqalereernikuuvugut suliamik ingerlatsisut pissutaallutik - atorluarnerusariaqarpagulli ullumimut naleqqiullugu, nunarput pillugu.

Taamatut oqaaseqarluta siunnersuut itigartipparput takornariaqarneq pillugu siunnersuisoqatigiinnik allanillu peqareeratta. Aamma pisortat aningaasartuutaat amerlerusunngilagut suliaq ingerlanneqareermat kusanaqisumik.